

pences superfluës qui se font icy tous les ans, en ballets, ieux & banquets & en tant d'habits mondains, qui montent || iusques à l'excès, d'où sensuit la ruine de beaucoup de bonnes familles. 92

Avec la benediction du R. P. Prouincial ils s'acheminèrent à Dieppè enuiron la my May, où ils furent fauorablement receus dans les vaisseaux par le sieur Guillaume de Caen General de la flotte bien que de contraire Religion, car au reste il est homme poly, liberal & de bon entendement sçachant parfaictement bien commander en mer. Une chose en leur voyage leur fist grandement admirer la diuine prouidence en l'ordre, qu'il tient voulant sauuer les hommes. Il y auoit un an & plus qu'un Sauuage Canadien auoit esté amené à Dieppe lors qu'estant tombé malade il desira s'en retourner en son pays en la compagnie de nos Peres, sans pour cela monstrier aucune inclination pour le baptesme.

Estant embarqué il eut de merueilleuses tentations ou plustost imaginations qui augmentoient grandement son mal. Il eut opinion que le maistre du vaisseau le vouloit faire mourir, de maniere que s'il remuoit une corde il croyoit que c'estoit pour le pendre & s'enfuyoit se cacher au fond du Nauire, s'il alloit à luy il pensoit que c'estoit pour le iecter dans la mer & se prenoit à crier, & par ces continuelles inquietudes d'esprit il se mit si bas & s'afoiblit de telle sorte qu'il fut contraint d'en garder le liët, & chercher remede à sa santé, mais qui fut tout extraordinaire, car s'imaginant que mangeant beaucoup & || incessamment seroit le vray moyen de sa guarison, il crioit tousiours à 93